


www.BibleForChildren.org


Matiu 8




Burina ro maedangi ki sui, te araie ka fuli ana te mae fere ne satana 'i Kena 'i laona lofaa 'i Galili. Ma gaa sa Jesus ka to laugo 'i senai ana kada nai. Ma kera ka laefia laugo mai sa Jesus fainia fafurongo nia ki 'uria na araie nai.



Ma kada ne wane ki kera ku, ma na waeni kera ka sui,
gaa sa Jesus ka fata 'uri fuana, "Kera nao si to na ana
ta waeni." Ma gaa sa Jesus ka fata 'uri fuana wane
rao ki, "Mulu sasi sulia ru ne nia kai saea fua mulu."



Ma sa Jesus ka fata 'uri fuana wane rao
ki, "Mulu ongia kufi ru ne ki ana kafo." Ma
kera ka ongida leka ka fungu. Sui nia ka
fata 'uri fuada, "Mulu ongia kafo, ma
mulu ka kwatea fuana wane baita ana
fafanga ne." Ma kera ka
kwatea fuana, . . .



. . . ma nia ka ku to'ona kafo nai, ne 'e alu na waeni.
Ma nao nia si saitamana waeni ne nia leka mai fasia 'i
fai. Boro ma na wane rao
ne kera ongia mai kafo
nai go ne kera
saitamana tafau.



'Urinai na wane baita ne ka akwa mai 'uria na arai falu
nai, ma ka fata 'uri fuana, "Na wane ki tafau kera
kwatea waeni lea 'i nao, ma
'i burina wane ki kera ku
ka suina, nia fi kwatea
na waeni ne 'afae. Boro
ma 'oe konia na waeni
lea ne leka ka dao
na ana kada ne!"





Nia na ne etana fanadae ne sa Jesus nia sasia. Nia sasia laona fere 'i Kena laona lofaa 'i Galili. Senai nia ka fatainia na 'initoe nia, ma na fafurongo nia ki kera ka famamana nia na.



Ma ana te maedangi, sa Jesus ka leka
mai 'i lume sa Pita. Kada sa Jesus ru
'i lume, nia ka ada to'ona fungo keni
sa Pita nia tio ga 'ana, ne nia matai
ana 'ako'akolae baita.




Ma sa Jesus ka samo to'ona 'abana na keni ne. Ma ana
kada nai go, na 'ako'akolae nai ka sui na fasia. Nia ka
'akwa na, ma ka tatae ka sasi fanga na fua sa Jesus.



Ma ana fa saulafi nai, kada sato nia su, na wane ki
kera ngalia mai wane matai ki, ma to ne anoeru
ta'a rufida ki laugo
siana sa Jesus. Ma
tooa ana fere nai kera
ka oku tafau mai 'i
maana lume nai.



Ma sa Jesus ka gura na wane 'oro ki ne kera matai
ana na mataie 'oro 'e'ete ki. Ma nia ka ifulangainia
laugo na anoeru ta'a 'oro ki. Ma nia si alamatainia ne
anoeru ta'a nai ki kera ka fata, sulia kera saitamana
sui go ana ne nia Wele God.




Na wane ki tafau kera ili 'uria samolae to'ona sa
Jesus, sulia na nikilalae nia leka kau fasia
fuana guralana na
wane ki tafau.




Ma ana kada nai laugo, na fai wane ki kera leka
mai, kera ka ngalia mai te wane ne nonina mae.




Ma sulia ne fikue baita nai, nia
ka 'afitai na fuana ngalilana
kau siana sa Jesus. 'Urinai
go, kera ka ra 'i fafona
lume fainia na
wane nai.




Ma kera ka tafangia te mae kwakwa
baita 'i fafona lume bobola fainia
kula ne sa Jesus nia to ana,
ma kera ka fakosoa na
wane nai 'i fafona
'ifitai nia siana
sa Jesus.




Ma kada sa Jesus nia ada
saitamana famamanae kera,
nia ka fata 'uri fuana
wane nonina mae nai,
"Wele nau 'ae, nau
ku manatalugea na,
na ta'ala'e 'oe ki."
Urinai nia ka fata
'uri fuana wane nai
ne nonina mae,
"Nau ku saea fuamu,
'oe tatae, ngalia na
'ifitai 'oe, ma 'oko
leka na 'i fere 'oe."




Ma sa Jesus ka tae laona baru fainia fafurongo nia ki.
Ma ana kada kera 'idu tau na kau,
mae kuburu ka dao 'ali'ali mai,
ma na asi ka lulua, ma ka
magara na mai fafia na
baru nai. Ma na baru nai
karangi kai kuruu na. Boro
ma sa Jesus nia ka
maleu ga 'ana laona
baru nai.



Ana kada nai sa Jesus ka fata 'uri fuada, "'Uta ne kamulu ka mau? Nau ku ada to'ona na famamanalae kamulu aku nao si baita." Sa Jesus ka fata 'urinai fuada ka sui, nia tatae, ma ka fata nikila fuana kuburu ma na nanafo, fua kera ka aroaro.



Ma ana kada nai go, na kuburu ma na nanafo ki kera
ka aroaro na, ma ka fola na. Ma na fafurongo nia ki
kera kwele 'asiana, ma kera fata 'uri, "Wane 'uta
ne? Na kuburu ma na nanafo boroi
kera ro na sulia!"



God fatainia na kwaimanie baita nia
fuana wane ki tafau laona molagali
ne 'uri, nia ka kwatea mai te Wele
mutai nia, fua ne sa ti ne kera
famamana nia, kera nao si
funu, boroi ma kera
kai mauri firi.



Rom 3:23

Wane ki tafau go kera abulo ta'a, ma nao ta wane si to
ana falafala ne kai fa'initoa God.

Rom 6:23

Sulia na abulo ta'alae nia kwatea mae, boroi ma na
kwatee ne God kwate sakongai ana nia na ne maurie firi
sulia sa Jesus Christ na 'Aofia kulu.

Hibru 9:27

Aia, ma na wane laona molagali ne ki, kera mae ana te fa
kada go, suifatai God kai ketoda.



Efesus 2:8,9

God famaui kia ana kwaiofeie nia sulia na famamanae
kia. Nia nao si famaui kia go sulia raoe kia ki tala'aka.
Boroi ma God kwate 'o'oni ga 'ana na maurie falu fuaka.
Nia ne, 'afitai ta wane ka fata naunau sulia na maurie
falu nia, sulia God nao si kwatea sulia
raoe ne kulu sasida ki.

Rom 10:9,10

Dia kamulu saea sa Jesus ana 'Aofia, ma mulu kai
famamana ne God taea fasia mae, God kai famaui
kamulu. Na wane ne nia famamana sa Jesus laona
maurilana, nia 'o'olo 'i maana God. Ma wane ne nia fata
tafa ana sa Jesus nia 'Aofia, God kai famaui.



Jon 3:16,17

God fatainia na kwaimanie baita nia fuana wane ki tafau laona molagali ne 'uri, nia ka kwatea mai te Wele mutai nia, fua ne sa ti ne kera famamana nia, kera nao si funu, boroi ma kera kai mauri firi. God nao si kwatea mai na Wele nia laona molagali fuana ketolana na wane ki, boroi ma nia kwatea lalau mai fuana famaurilada.

1 Jon 5:11-13

Ma fatae ne God ka famamana sulia na Wele nia ne 'uri: God kwatea na maurie firi fuaka, ma na maurie ne ka safali mai fasia na Wele nia. Ma sa ti boroi 'ana ne 'ado fainia na Wele God, nia too ana maurie firi. Ma sa ti ne nao si 'ado fainia na Wele God, nia nao si too laugo ana maurie firi. Nau ku kede na ru ne ki fua mulu wane ne famamana Wele God, fua ne mulu kai saitamana ne mulu too na ana maurie firi.



Matiu 8-9; Mak 1-2, 4; Luk 4, 8; Jon 2

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: E. Frischbutter; Sarah S.

Fataleka Bible (far) © 2017, Wycliffe Bible Translators,
Inc. All rights reserved.

<https://live.bible.is/bible/FARWBT/MAT/1>

©2026 Bible for Children, Inc.

www.M1914.org

www.bibleforchildren.org

